



# Icyegeranyo cy'amakuru y'imikino yaranze icyumweru

2024

Taliki 04-08 Mutarama



P.1 Badminton : Abatoza n'abakinnyi bongerewe ubumenyi

## Ijambo ry'ibarange

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'l'mikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigisimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

## Ibirimo

P1

**Badminton :** Abatoza n'abakinnyi bongerewe ubumenyi

P2

**Volleyball :** Abasifuzi barahuguwe mbere ya shampiyona

P2

**Handball :** Ikipe y'u Rwanda yerekeje mu Misiri mu gikombe cy'Afurika

P3

**Sitting Volleyball :** Ikipe y'u Rwanda izitabira imikino yo gushaka itike Paralempike 2024

P3

**Tennis :** Hasojwe umwiherero w'abana bafite hagati y'imyaka 12 na 15

## Badminton : Abatoza n'abakinnyi bongerewe ubumenyi

Kuva taliki O3 kugeza O7 Mutarama 2024 muri Maison des Jeunes Kimisagara habereye amahugurwa y'umukino wa Badminton ku barimu ndetse n'abakinnyi akaba yarateguwe n'ishyirahamwe ry'uyu mukino mu Rwanda "RBSF".

Aya mahugurwa yatanzwe n'impuguke ebyiri zirimo iyavuye mu mpuzamashyirahamwe y'uyu mukino ku rwego rw'Afurika , Bokpe Nonvide Bernardin ukomoka muri Benin ndetse n'iyoherejwe n'ihuriro ry'amashyirahamwe y'umukino wa Badminton mu bihugu bikoresha ururimi rw'Igifaransa, Lamidi Eliassou ukomoka muri Togo.

Aya mahugurwa yabaye mu byiciro bibiri harimo icyiciro cya mbere cyahariwe abarimu 42 bari baturutse mu mashuri yo hirya no hino mu gihugu. Ibi bikaba biri muri gahunda "Shuttle Time" yatangijwe n'ishyirahamwe ry'umukino wa Badminton ku lsi "BWF" ikaba igamije guteza imbere uyu mukino binyuze mu mashuri.

Iki cyiciro cyabaye iminsi ibiri, kuva taliki O3 kugeza O4 Mutarama 2024.

Mu cyiciro cya kabiri, abakinnyi 22 bongerewe ubumenyi mu gihe cy'iminsi 3, kuva taliki O5 kugeza O7 Mutarama 2024.

Bamwe mu bahuguwe muri ibi byiciro byombi batangaje ko aya mahugurwa ari ingirakamaro kuko bungukiyemo byinshi bizabafasha mu guteza imbere umukino wa Badminton.

Bokpe Nonvide Bernardin watanze amahugurwa yatangaje ko mu Rwanda hari abakinnyi beza, muri aya mahugurwa akaba wari umwanya mwiza wo kubafasha kuzamura ubumenyi mu mikinire kugira ngo mu minsi iri imbere bazaserukire u Rwanda mu marushanwa mpuzamahanga atandukanye.

Perezida w'ishyirahamwe ry'umukino wa Badminton mu Rwanda "RBSF", Muhamma Alphonse yagaragaje ko ubumenyi mu bijyanye na Tekinike bwatanzwe muri aya mahugurwa buzafasha mu kuzamura uyu mukino ku buryo mu minsi iri imbere hazaboneka abakinnyi bazajya bahagararira igihugu.

Yakomeje avuga ko uretse kuba abakinnyi bagiye kuzamura urwego rw'imikinire, umukino wa Badminton ugiye gukwirakwira mu gihugu hose kuko abarimu bahuguwe baturutse mu bice byose by'igihugu.



## Volleyball: Abasifuzi barahuguwe mbere ya shampiyona

Taliki 06 na 07 Mutarama 2024 habaye amahugurwa y'iminsi ibiri yahuje abasifuzi b'umukino wa Volleyball mu Rwanda mu rwego rwo kwitegura shampiyona y'icyiciro cya mbere mu bagabo n'abagore izatangira taliki 20 Mutarama 2024.

Muri rusangeaya mahugurwa "Rwanda Volleyball Referee's Refresher Training" yitabiriwe n'abasifuzi 80 akaba yarayobwe n'abasifuzi mpuzamahanga b'Abanyarwanda muri Volleyball, Ndayisaba Alphonse na Nsanzamahoro Faustin.

Aba basifuzi bitabiriye bongeye kwibutswa amategeko kugira ngo imikino izatangire biteguye.



## Handball: Ikipe y'u Rwanda yerekeje mu Misiri mu gikombe cy'Afurika

Ikipe y'u Rwanda mu bagabo mu mukino wa Handball yerekeje i Cairo mu Misiri aho igiye kwitabira ku nshuro ya mbere imikino y'Afurika "Men's Handball African Cup of Nations 2024". Iyi mikino izaba kuva taliki 17 kugeza 27 Mutarama 2024.

Ikipe y'u Rwanda yahagurutse i Kigali, taliki 09 Mutarama 2024 igizwe n'abakinnyi 18 ndetse n'abatoza.

### Abakinnyi 18 ikipe y'u Rwanda izifashisha

**Abakinnyi:** Uwayezu Arsene, Baninimana Samuel, Kubwimana Emmanuel, Mugabo Samuel, Muhumure Elyse, Muhamenayo Jean Paul, Rwanmanywa Viateur, Karenzi Yannick, Ndayisaba Etienne, Nshumbusho Maliamungu, Nshimiyimana Alexis, Mbesutunguwe Samuel, Musoni Albert, Umuhire Yves, Kayijamahe Yves, Urangwanimpuhwe Guido na Hagenimana Fidele.

**Abatoza:** Rafael Guijosa, Bagirishya Anaclet, Ntabanganyimana Antoine, Mudaharishema Sylvestre, Byiringiro Jean Pierre Cyrille (Fitness Coach) na Mugwiza Philippe (Physiotherapist).

Mu rwego rwo kwitegura, ikipe y'u Rwanda izakina imikino ya gicuti na Maroc ndetse na Congo Brazaville taliki ya 12 na 14 Mutarama 2024.

Iyi kipe y'u Rwanda igiye kwitabira ku nshuro ya mbere iri mu itsinda A hamwe na Cap Vert, RDC na Zambia. Itsinda B rrimo Misiri, Guinea, Cameroun na Congo Brazzaville. Itsinda C rrimo Maroc, Algeria, Gabon na Libiya naho itsinda D rigizwe na Tunisia, Angola, Nigeria na Kenya.

Muri iri rushanwa rizaba ribaye ku nshuro ya 26, amakipe 5 ya mbere azabona itike yo kuzaserukira Afurika mu mikino y'igikombe cy'Isi "IHF World Men's Handball Championship 2025" izabera muri Croatia, Denmark na Norway kuva taliki 09 kugeza 27 Mutarama 2025.

Ikipe izegukana igikombe kandi ni yo izaserukira Afurika mu mikino Olempike izabera i Paris mu Bufaransa kuva taliki 25 Nyakanga kugeza 11 Kanama 2024.



## Sitting Volleyball : Ikipe y'u Rwanda izitabira imikino yo gushaka itike Paralempike 2024

Taliki 28 Kanama kugeza 08 Nzeri 2024 i Paris mu Bufaransa hazabera imikino y'abantu bafite ubumuga "Paris Paralympic Games 2024".

Mu mukino wa Sitting Volleyball mu rwego rwo gushaka amakipe azaserukira Afurika muri iyi mikino, taliki 06 Mutarama 2024 habaye tombola y'uko amakipe azahura mu gushaka itike y'imikino Paralempike 2024.

Muri iyi mikino izabera i Lagos muri Nigeria kuva taliki 29 Mutarama kugeza 03 Gashyantare 2024, mu bagabo hazitabira amakipe 8 aho yashyizwe mu matsinda abiri. Itsinda A rigizwe na Misiri, Maroc, Nigeria na Kenya naho itsinda B rigizwe n'u Rwanda, Zimbabwe, Algeria na Libiya.

Ikipe izegukana igikombe ni yo izabona itike yo kwitabira imikino Paralempike 2024.

Mu bagore hari amakipe 3 azakina hagati yayo iyegukanye igikombe ibone itike. Aya makipe ni u Rwanda, Zimbabwe na Nigeria.

## Tennis : Hasojwe umwiherero w'abana bafite hagati y'imyaka 12 na 15

Taliki 04 Mutarama 2024 ni bwo hasojwe umwiherero w'ibyumweru bibiri wari wahuje abana 12 bafite hagati y'imyaka 12 na 15 mu mukino wa Tennis. Umwiherero wari watangiye taliki 21 Ukuboza 2023.

Uyu mwiherero wari wateguve n'ishyirahamwe ry'umukino wa Tennis mu Rwanda "RTF" ku bufatanye na Komite Olempike y'u Rwanda ku nkunga ya Olympic Solidarity muri gahunda yo gutegura abakiri bato "Youth Athlete Development Programme 2021-2024" ahazavamo abazaserukira u Rwanda mu mikino Olempike y'urubyiruko "Dakar 2026 Youth Olympic Games".

Mu gihe cy'uyu mwiherero aba bana banasobanuriwe indangagaciro Olempike "Olympic Values" ndetse banakangurirwa kwirinda imiti itemewe yongerera imbaraga abakinnyi.

Bamwe mu bana bitabiriye uyu mwiherero bahise babona amahirwe yo kwitabira imikino y'abakiri bato muri aka Karere k'Afurika y'Uburasirazuba "ITF/CAT Eastern African Junior Individual & Teams Championships 2024" irimo kubera i Bujumbura mu Burundi kuva taliki 05 ikazasozwa 16 Mutarama 2024.

### Abakinnyi baserukiye u Rwanda

Aba ni Niyibizi Jedekia, Habimana Sheja Ben Alick, Rutayisire Kevin, Muhamenimana Sapuna, Uwitonze Julienne, Uwase Pamela, Murinzi Gedeon, Habiyambere Promesse Calvin, Nimigisha Abedi, Ishimwe Bimenyimana Melissa, Ineza Thierrine na Weilk Loana Eunice.





Website: [www.olympicrwanda.org](http://www.olympicrwanda.org)

[www.olympicrwanda.org/commonwealth](http://www.olympicrwanda.org/commonwealth)

Email: [cnosr@olympicrwanda.org](mailto:cnosr@olympicrwanda.org) | [Twitter](https://twitter.com/RwandaOlympic) [Facebook](https://facebook.com/RwandaOlympic) [Instagram](https://instagram.com/RwandaOlympic) [YouTube](https://youtube.com/RwandaOlympic) @RwandaOlympic

Address: Remera-Hallmark Center Building KG 17 Ave